



Steen Lyngé  
Inatsisartunut ilaasortaq, Demokraatit

## § 37 naapertorlugu apeqqummut 256/2018-imut akissut

### 1. Naalakkersuisut qanoq isumaqarfigaat, nakorsanik EU-mi ilinniarsimasunik atorfinitsitsisinnaaneq?

#### Akissut:

Peqqinnissaqarfimmi sulisunik EU-p iluani ilinniagaqarsimasunik atorfinitsitsisinnanermut periarfissat misissorneqarnissaat pitsaasumik isigaara. Maanna nakorsanik atorfinitsitsisoqartalereerpoq Danmarkip avataani EU-mi nunani allani ilinniagaqarsimasunik. Nakorsat taakku piffissami sivisunerusumi Danmarkimi sulinikuugamik Danmarkimi akuersissuteqarput qallunaatullu oqaluttarlutik.

Maannakkuugallartoq nakorsanut piumasaqaatigineqartarpoq nunatsinni atorfininnissamut Danmarkimi akuersissuteqarnissaq. Tamanna inatsisitigut piumasaqaataangilaq matumanili Danmarkimi malittarisassat inatsisillu malittuarneqarnikuupput. Tamatumani qulakkeerniarlugu nakorsat ilinniarsimasuunerat kiisalu qaffasissumik akuersissuteqarnerat.

Nakorsanik sulisunillu allanik qallunaatut oqalussinnaangitsunik atorfinitsitsinissamut arlalinnik akornutissaqarpoq. Maannamut Kalaallit Nunaanni nalinginnaasuuvoq napparsimasut nalunaarsuiffiini oqaatsit atorneqartut qallunaatuujusarneri imaluunniit kalaallisuujusarneri. Tamannali inatsisitigut piumasaqaataangilaq. Assersuutigalugu akuerineqarnikuvoq ilaatigut tarrarsuilluni misissuinerit ilai nunani allani nalilerneqartarneri taakkunani akissutit tuluttut allassimasarlutik. Suliani taakkunani nakorsaq paasissutissanik atuisoq taannaavoq tuluttut allassimasunik paasinninnissamut akisussaasuusoq. Sullitat pillugit isumannaatsuunissamut ilaatigut unammillernartoqassaaq ass. sulisunik tuluttuinaq oqaluttunik atorfeqartitsinermi. Suliami nalinginnaasumik oqalutsinik pissarsiniarnissaq unammillernartoqarsinnaavoq peqqinnissaqarfimmi sulisut nunani avannarlerni oqaatsinik atuisuungippata.

### 2. Nunani aalajangersimasuni nakorsanngorniartarneq naammattumik pitsaassuseqartutut isumaqarfigineqangippat taava EU-p iluani nunaqarnerluni nakorsanngorniartarfeqartunik Danmarkimi nunanilu avannarlerni pitsaatigisutut nalilerneqarsinnaasumik?

#### Akissut:

Aap, tamanna periarfissaavoq kisiannili unammillernartut pillugit apeqqut 1-imi akissutinut innersuussisoqarpoq.

12-10-2018  
Sags nr. 2018 - 19460  
Akt nr. 8849477

Postboks 1160  
Tlf: 34 50 00  
Fax: 34 55 05  
3900 Nuuk  
Email: [pin@nanoq.gl](mailto:pin@nanoq.gl)  
[www.naalakkersuisut.gl](http://www.naalakkersuisut.gl)

**3. Apeqquut 2 naaggaarneqassappat, taava sooq taamatut isumaqartoqarpa?**

**4. Naalackersuisut ilimaginnginnerlugu nunani soorlu Tysklandimi Tuluit Nunaannilu immikkut ilisimasallit Danmarkimisut qaffasitsigisumik imaluunniit sulii qaffasinnerusumik piginnaaneqarsinnaasut?**

**Akissut:**

Apeqquut 2-mut akissummut innersuussisoqarpoq.

**5. Apeqquut naaggaarneqassappat, taamatut akissuteqarnerminni Naalackersuisut suna tunngavigaat?**

**6. Naalackersuisut misissussamaarnerlugu nunani allani soorlu Tysklandimi Tuluit Nunaannilu immikkut ilisimasalinnik suleqateqarsinnaanissaq?**

**Akissut:**

Nakorsat suliaasaanut atatillugu pingaartumik Nuup avataani peqqissaavinni kiisalu qitiusumik napparsimmavinni tamatigoortumik nakorsatut piginnaasallit kiisalu pilattaasartut annertuumik piginnaasallit amigaatigineqarput. Nakorsat taakku immikkut pisariaqartinneqarput piginnaasaat peqqissaavinni kiisalu napparsimmavinni pisariaqartinneqarmata. Nakorsat taakku nakorsatut immikkut ilisimasalittut isigineqanngillat. Nuummi nakorsat immikkut ilisimasallit ass. tarnip pissusaannik ilisimasallit amerlanngitsut amigaatigineqarput.

Suliaasaqarfinni immikkut ilisimasaqarfiusut iluanni Kalaallit Nunaanni Peqqinnissaqarfik Region Hovedstaden-imut pingaarnertut isumaqatigiissuteqarpoq. Suleqatigiinneq, naammaginarluinnartumik ingerlasoq kiisalu siunnersortinnissamut avitseqatigiinnissamullu ujaruiffiusinnaasoq. Napparsimasut immikkut katsorsaaneerik pisariaqartitsisut Kalaallit Nunaanni neqeroorutigineqarneq ajortunik Danmarkimi katsorsarneqartarput.

Suliaasaqarfinni immikkut ilisimasaqarfiusuni misissuinerit, nassuiaanerit katsorsaaneerlu Nuummi ingerlanneqarnissaat naleqquttuuppat, tamanna ass. iviangikkut kræfteqarneq pillugu suliaasaqarfiup iluani maanna pisarpoq tassani immikkut ilisimasalik sapaatip akunneri arfinilikkaarlugit Nuummukartarpoq.

Immikkut suliaasaqarfiit iluanni allanik immikkut aaqqiissuteqartoqassappat tamanna uninngavissanik kiisalu immikkut ilisimasalimmut sullissisussanik sulisussanik amerlisitsinermik piumasaaqateqassaaq ilaatigullu pisut ilaanni immikkut atortussanik pisariaqartitsisoqassalluni.

Tamanna tunngavigalugu suliaasaqarfiit immikkut ilisimasaqarfiusut iluanni Danmarkip avataanniittunik nunanik allanik suleqateqarnissaq maannakkuugallartoq pisariaqartinneqanngilaq.

**7. Naalackersuisut misissorsinnaanerlugu Tysklandimeersunik imaluunniit Tuluit Nunaanneersunik nakorsanik atorfinitsitsisoqarsinnaanersoq piffissami killilimmi Kalaallit Nunaanni sulisinnaasunik?**

**Akissut:**

Tuluit Nunaannit Tysklandimillu nakorsanik sulisussarsiortarnissaq ajorinngilara, tassungalu atatillugu misissuineq aallartissallugu.

**8. Naalackersuisut tusagassiutitigut nalunaarutigaat Danmarkimi nakorsanik pilersaarinnissaq pillugu Danmarkimi sulisussarsiortarfimmik pilersitsiniarlutik, soormita Naalackersuisut Danmarki nunallu avannarliit kisiisa aalluppaat uffa nunat taakku aamma nakorsassaaleqereersut?**

**Akissut:**

Kalaallit Nunaat, akuersissutit minnerunngitsumillu oqaatsit pillugit ilisimasaqarnissaq eqqarsaatigalugu nakorsanik sulisussarsiortarnermi Danmarkimi sulisussarsiortarfik naleqquttoqarjussuuvog

Danmarkimi sulisussarsiortarfimmik pilersitsinikkut Danmarkimuinnaq killiliisoqassanngilaq. Danmarkimiinnermi peqqinnissaqarfiup iluani sulisussanik nunanit allaneersunik ineriartornermut qaninnerulertoqassaaq taamaasillunilu ineriartorneq qanimut malinnaavigineqassalluni. Ilanngullugu sulilersussap suliassaraa, suliasussat nunanit allaneersut kiisalu peqqinnissaqarfinni allani, matuma ataani Danmarkimi Islandimilu misilittakkat pillugu periarfissanik misissuineq.

**9. Naalackersuisut Danmarkip ungataani suleqatissarsiorsinnaanissaminut isumaqatigiissutinik inatsisinilluunniit aporfissaqarsimanerlutik?**

**Akissut:**

Apeqqummut 1-mut akissut takuuk.

Naalackersuisut isumaqatigiissutinik Danmarkillu saniatigut nunanik allanik suleqateqarnissamut akornusiisunik inatsisinit pituttorneqanngillat. Napparsimasut peruluttut napparsimasullu katsorsarneqaaqqittussat, ass. Danmarkimi, Islandimut aallartinneqartarput, tassanngalu misilittakkat takutippaat minnerpaamik qallunaatut oqalussinnaasunik nakorsaarneq imaluunniit peqqinnissaqarfimmi sulisoarneq unamminiarnartuusoq. Ukiorpaalunni Islandimut suleqateqarnerup annertusarnissaa periarfissaasimannngilaq oqalutsinik amigaateqarnerup kingunerisaanik. Napparsimasut oqaatsinik kalaallisut ilaatigullu qallunaatut taamaallaat ilisimasaqarneq pissutigalugu oqalutsit pisariaqartittuarpaat. Tunngaviunerpaanulluunniit ass. akunnittarfimmut inissinniarnermi il.il. oqalutsit pisariaqartinneqakkajuttarput. Tamatuma ajoraluartumik tunngavilersorpaa, maannakuugallartoq tuluttut oqaluttunik nakorsaarsinnaaneq periarfissaanngitsaq.

**10. Naalackersuisut Nunat Avannarliit ungataaneersunik nakorsanik atorfinissaat mattunneqarsimanerluni isumaqatigiissutit inatsisinilluunniit atuuttut pissutigalugit?**

**Akissut:**

Naamik.

**11. Naalackersuisut qanoq iliorsinnaappat nunani allaneersunik soorlu Tysklandimeersunik imaluunniit Tuluit Nunaanneersunik nakorsanik atorfinitsitsinissamut aporfiusinnaasut piiarniarlugit?****Akissut:**

Siunissami qaninnerusumi nakorsanik akuersisarnermut tunngatillugu akisussaaffiup tiguissaanut periarfissat misissorusuppakka.

Tamatuma saniatigut aaqqiissutit immikkut ittut atorlugit nakorsanik allamiunik atorfinitsitsinissamut periarfissat misissorerorusuppakka, tamatumani nakorsat Kalaallit Nunaanni sulinissamut piareersarneqartassallutik. Nakorsat oqaatsitigut piginnaasaasa ineriartortinnissaasa aallunnerisigut ilaatigut taamaaliortoqassaaq.

Aamma pingaaruteqarpoq atugassat allat nakorsanut taakkununga neqeroortigineqarsinnaasut ass. ineqarneq, atuarfiit aamma meeqqanik paaqqinnittarfiit, internet minnerunngitsumillu aningaasarsiatigut atugassat eqqarsaatigineqarnissaat.

**12. Naalackersuisut suliamut tunngatillugu allanik soqutiginartunik paasissutissiisinnaanerlutik?****Akissut:**

Ilisimatitsissutigineqarsinnaavoq Ilinniartitaanermut, Kultureqarnermut, Ilageeqarnermut Nunanullu Allanut Naalackersuisoq inuusuttut amerlanerusut nakorsanngorniarluni ilinniarnermik naammassinninnissamut periarfissaasa pitsanngorsarnissaasa eqqartornissaat siunertarlugu oqaloqatigerusukkakku.

Tamatuma saniatigut Aningaasaqarnermut Naalackersuisoq peqqinnissaqarfimmi sulisut atorfeqartitaanermi atugassarititaasa pitsanngorsarnissaannut periarfissat pillugit oqaloqatigerusuppara.

Inussiarnersumik inuulluaqqusillunga

Doris J. Jensen